

SAN PABLO CARTA GALACIA QUIWESUWE'SH JÏI

Galacia quiwesuwe'shtyi wechana fi'jni

1 ¹ Andya' Jesucristo jycaajnisá Pablo yaasetj. Naa quiwete pitstjê'jwe'sh andya's tyjityjrra jycaajnisameetj, wejyva Jesucristo vite' Dyus cue'sh Tata na'wê uuniijüva qui' ïtyi vitcu tyāawe'sh jycaajnisatj. ² Andy vite' yacjtjê'jwe'sh ayte üssa tyāawe'sh yacj naa carta's fi'jrra cajastju Cristo nasa Galacia quiwesu pcjaacjena üssawe'shtyi wechana. ³ I'cue'shtyi' Dyusa' pu'chjina ewrráa caafi'nze'jna vite' cue'shtyi jype'jsa Jesucristo. ⁴ Tyāa Jesucristo íc cue'sh pcaltyi cjücjrra ewmeejü nwe'weya' peequí ya'ducjrra cue'sh pa'gate uu, Dyus jytjāasnirrá's cytey yuuna. ⁵ Tyāa pa'ga Dyusa's bagachteva wala wechawa'j ji'ptja'w.

Dyus yuwe vite yu' meea'

⁶ I'cue'sha' Cristo nwe'wenijü tyachmeyna tyuteerra Dyus yuwe vite fiy caapiya'jnirrá's nwēese'jna üsta' jñi's jiyurra', andya' wala cuj yaaqui'tj. ⁷ Ewte nviitwa'jsa Dyus yuwe vite yu' meea', nava i'cue'shtyi caypumba'j wēerraráa maafi yu' Cristo caapiya'jni's yu'ptje'jrra fiy caapiya'jna üsta'. ⁸ Nava cue'sh pta'shtja'w tyā'wémée fiy caapiya'jna pa'jatyna Dyus yuwe' jina atsa' tyā'wē yūusatyi' Dyus yuu iiméj seena' ewmeesata' jirra iviituwa'tje nviitni yuutyna. Meerra' andy ma'tj fiy caapiya'jna pa'j meerra' cielujü quiisa angel ma'c tyā'wē fiy caapiya'jna pa'j nava tyā'wē yūusa yuutyi' tyā'wēerraráa yuuni yuutyna. ⁹ Na'j'i'tj na': Maava Dyus yuwe's pta'shsatja'w jirra fiy pta'shna pa'jatyna cue'sh caapiya'tja'w tyā'wémée atsa' tyāa nasatyi' Dyus yuu iiméj seena' ewmeesata' jirra iviituwa'tjerráa nviitni yuutyna.

¹⁰ Na'wétj we'we' atsa' i'cue'sha' peecy mjiyuwe: andya' naa quiwete pitstjê'jwe'sh andya's ew we'we jytjāasna üsmeetj, naasáa Dyus

caaüusutjel'nirrá'stju áate we'we'. Sa' naa quiwete pitstjê'ljwe'shtyi wechaa jytjáasna úsrra', Cristona selpiisameerra tyã'wê yu'nja.

Judiu jil'mée vite nasaty Dyus yuwe's pta'shsa Pablo

¹¹Yacjtjê'ljwe'sh mjiiyuwe: Na'wê Dyus yuwe ewte nviitwa'jsa's pta'shi'tj tyã' pitstjê'ljwe'sh úus yajcyrra caapiya'jnisame!. ¹²Tyã'sa' andya's naa quiwete pitstjê'ljwe'sh úsmeeta', naasáa Jesucristo yuurráac caajiyu'j.

¹³I'cue'sha' jiiyã'jne'cue andya' nyafi' judiuwe'sh jycaajni's nwêese'jna úsrra', ma'wê'tca fi'nze!, sa' ma'wê'tca seena' juuna' yuuna Cristo nasaty ajtse iviituya' sújrra. ¹⁴Andya' judiuwe'sh jycaajni leya's quíjte yujva peejymée jyucatj cytey yuuna ússa yu', andy ja'ndawe'sh úsu'ty tyãawe'shte jytjaacue. Sa' andy yatsgawe'sh caapiya'jni's andyrráatj iiméj ew cytey yuusa yu'. ¹⁵Tyã'wê atsesateva, Dyusa' andya's iiméj wala peeygájrra, mama tutyuj casejmeyna tyjityjrra nviitnisa ne'tca yu'. ¹⁶Tyãasac tyajy Nchi'ca's jiyuwa'j en ájte!, andya's pa'yarra caajiyu'j tyã'wê tyajy yuwe ewte nviitwa'jsa's judiu jil'mée vite nasaty pta'shcajn. Atsa' andya' maa yujtyva paapéjyja' u'ljmeetj. ¹⁷Jerusalente Jesucristo jycaajnisawe'sh úsu'ty tyãawe'shrráa yujtyva tjengya' u'ljmeetj. Tyã'wê yúupcachte wejyva Arabia quiwentju u'j, sa' tyãa e'su shawendrra' Damascontju u'j.

¹⁸Sa' tecj añu scjêwnijütj Jerusalenna u'j, tyãasatj Pedro's jiyu, sa' cytee úsu'tj tyãa yacj e'nz qui'su ájpcach. ¹⁹Nava Jesucristo jycaajnisawe'sh vite yu' jwee yu' uymeetj, naasáa Jesucristo nyacj Jacoborrá'stju uy. ²⁰Dyus dyi'pte isatj we'we', na'wê quim yujtyva paapéjymeetj jina filjatstju tyã' íshiinisame!.

²¹Tyãa e'su' Siria vite' Cilicia quiwentju u'j. ²²Atsa' Cristo nasa Judea quiwesu ústa' tyãawe'sha' andy yu'sa' iuuymeeta', ²³naasáa nal'jinirrá'styi wêse'j: Cue'shtyi ajtserra iviitu wêesarrava, áchja' Cristo's jypa'gawa'ja's pta'shna u'ju' jini'styi wêse'j. ²⁴Tyã'wê wêse'jrra', Dyusa's wala wechaty andy tyã'wê yúupa'ga.

2 ¹Catorce añu scjêwnijü' qui' u'tj Jerusalenna, Bernabé vite' Tito tyãawe'shtyi pe'jrra. ²Tyã'wê u'jwa'ja's Dyuscu pta'sh tyãa pa'gatj andya' u'j. Sa' cytee Jerusalente jycaajsawe'shta' jini úsu'ty tyãawe'sh yacj dundte pcjaacjerra tyãawe'shtyi pta'shtju na'wê judiu jil'mée vite nasaty caapiya'jal'tj Dyus yuwe ewte nviitwa'jsa's tyã'sna. Tyã'wê'tj pta'sh, tyã'wême' andy mjíini' ewmeec yu' jíwe'shte. ³Nava Tito andy yacj cytee úsu'c tyã'srráa yujnava caacircuncidaí'jmeeta', tyã' judiu meec yu' na'sva. ⁴Tyã'wê'teva tyãa entey cue'sh cshavyte u'caty cue'shva yacjtjê'ljwe'shtja'w jina íshiisa. Tyãawe'sh yu' Tito's caacircuncidaí'j wêety. Cue'sh tyã'wê yúumeerrava, Cristo Jesus yacj cue'sh ew fi'nzeni's suw wêerraty peetjengu'jya' u'ca, judiuwe'sh fi'nzenitey caashwendu'j wêerra. ⁵Tyã'wê'teva, wej yujva tyãawe'sh we'weni's cytey yuumeetja'w,

tyā'wē Dyus yuwe isa pta'shnirrá's i'cue'sh nwēese'jna nes yuucajntja'w tyāawe'sh we'weni's cytey yuumée.

⁶Cue'sh tyā'wē nwēese'jmeeteva, yacjtjē'jwe'sh jycaajsawe'sha' andya's caapiya'jwa'ljy fiy yu' quij yujva yu'cypejmeeta'. Macue tyāawe'sha' walasa ne'ta yu', nava andya' tyāaty' tjengu ji'pjmeetj, tyāa pa'gatey Dyus dyi'pte' maa yujva walasamée teechna na'wērrarráatja'w naa pa'ga. ⁷Tyā'wē caapiya'jwa'ja's fiy yu'cypejna pta'shipcachte, wejyva tyāawe'sha' jiyuty Dyus yuj indya's caajne', tyajy yuwe ewsa's judiu ji'jmée vite nasatyva pta'shcajn. Pedronava ma'wēga judiu ji'jrráaty pta'shwa'jsa nvijt, tyā'wēy ne' indya's vite nasaty pta'shwa'jsa nvijt jinarráaty we'we. ⁸Tyāa pa'gatey judiuwe'shrráaty pta'shwa'jsa Pedrona caajsa Dyus írráac andynava caaj judiu ji'jmée vite nasaa cshavysu.

⁹Tyajírráaty Jacobo, Pedro vite' Juan tyāawe'sha' walasata' jínisarrava, cue'shtyi'sa' ma'jmée Dyus ne' tyā'wē i'cue'shtyi's mjiíwa'jsa nvijt jírra wechana cuse ústy andyna vite' Bernabewe'shtyi na'jína: I'cue'sha' judiu ji'jmée vite nasa yacj mjiíne'cue, naapcachja' cue'sha' judiu ji'j yacjrráa mji'nja'w jírraty tyā'wē cuse ús. ¹⁰Naasáa yacjtjē'jwe'sh quíjva ji'pjmeé peejiina fi'nzesa yuutyi' pu'chwa'ja's pechcanamée yajcyna fi'nzene'cue jinarráaty neewe'we, atsa' tyā'sa' wala jypa'yacy cytey yu'tj.

Ewte neeyūuya' judiuwe'shva Cristo's úuste jypa'gawa'ja'

¹¹Tyā'wē Pedro' walasa' jínisateva, andya' tyā'sa' wala juuna' we'wetj, Antioquíate pa'jrra' ewmeec yūuna úsu' naa pa'ga. ¹²Pedro' Antioquíate úsrra', Jerusalenu Jacobo caajnisawe'sh pa'jmeyna yu' judiu ji'jmée vite nasa yacj pcjaacjerra tyāawe'sh yacj wa'lmeec ú'we'. Nava Jerusalenuwe'sh pa'jyā'tje', tyuteerra pcjaacjeme', tyajy ji'j circuncidāynisawe'shtyi úucjrrac tyā'wē yūu. ¹³Atsa' judiu ji'j Dyusna jiisa úsu'ty tyāawe'shva Pedro na'wēytyi yūu. Tyāa pa'ga Bernabé yujva Pedrowe'sh yacjcu utyáa. ¹⁴Dyus yuwe ewte nviitwa'jsa' tyā'wē jycaaja'tsme' na's tyā'wē fiy yuutste', andya' Pedro's wala juuna' we'wetj pcjaacjesawe'sh cshavyte na'jína: Indya' judiurrava, ayte úsrra' vite pa'jmeyna yu' judiu na'wēmeeng fi'nze. Nava áchj vite pa'tje yu', ¿quíjya'nga judiu ji'jmée vite nasa yacja' utyaawa'jme' jisa na'wē yu'?

¹⁵Cue'sha' mama tutyuj casejí judiu ji'tja'w yu', sa' Dyusna jiimeesa ji'j yu'tsmeetja'w. ¹⁶Macue judiu ji'jrrava, Moises leya'srráa yajcyte', maa yujva yuuwemée ewsa ya'yu'tsme', naasáa Jesucristo's úuste jypa'gate yuurráac yuuwemeesa ewte ya'neeyū'. Tyajírráatja'w cue'sha' judiurrava, yuuwemée ewte neeyūuya' sūjrra Jesucristo's úusuj jyuca yajcyrra jypa'ga, tyā'wē ley jycaajni yacja' yuuwemée ewte ya'neeyū'tsme' naa pa'ga. Atsa' leya's yaacysa' naa quiwete quim yujva yuuwemée ewte neeyūuwa'lsameeta'.

¹⁷Tyāasa ew yajcyte yu', macue judiurrava yuuwemeesa yuuya' Cristo's úuste jypa'gameerra yu', pcalsáírráa ne'tca'w. Tyā'jíte', leya's

nvijtrra Cristorrá's jypa'garra ne'tca'w yuuwe pcalsa yuu sūjuvá'cue. Wej yujva tyā'wēme!. ¹⁸ Moises leya's nwēese'ljmeete ewna jīrrava, e'su qui' we'werra': Pejca nwēese'tje ewna jīna we'wesa tyā'wē yuuwesa yuuna. ¹⁹ Andya' Moises leya's nvijtrrava qui' nwēese'ljrra' yuuwesa yuuya'mée tyāa ley yacja' uúsáa na'wētj yuu, Dyusrráana nwēese'ljya'. ²⁰ Andya' leya's nwēese'ljya'mée Dyus yacjrráa fi'nzeya', Cristo yacj ja'nda uúsáa na'wētj yuu, Tyāasa āchj ityi fi'nze'tj tyā' andy jūime!, andyna ityi caafi'nze'ljsa Cristo jī'. Tyāasatj naa cacue yacj ityi fi'nze'tsrrava, na'wē Dyus Nchi'c andyna peeygājrra peequíi ya'ducjrra uuc andy pa'gate tyāa yacj yuurráa fi'nze'. ²¹ Tyāa pa'ga Dyus peeygājrra ewte nviitni's weech wēemeetj. Tyā'wē leya's nwēese'ljja'garráa yuuwemée ewte neeyūuvatsa', Cristo uuni' cyulne' yuua'lj yu'. Nava tyā'wē yuume!.

Leypa'ga Dyus Espiritu's ya'jypa'ga'tsme'

3 ¹ Galacia quiwesuwe'sh, wala yuj jiimeesa yuui'cue. I'cue'shtyi' ¿quimiga tyacue wala ishii atscue Dyus yuwe isasa's nvijt? I'cue'sh tyā'wē yuucajmeníi tja'w cue'sha' áate pta'sh Jesucristo cluuscjē uúsáa quimteva. ² Mpeeta'shwe: I'cue'sha' ¿Moises ley jycaajni's nwēese'ljrracue Dyus Espiritu's jypa'ga'? Meerra' ¿cue'sh pta'shni's nwēese'ljrracue Dyus Espiritu's jypa'ga'? ³ I'cue'sha' pejca tyacue yu' wala jypumbawa'ljmeetena Dyus Espiritu i'cue'sh ūuste pu'chya' tacjni's ¿ma'wē i'cue'sh cacueju pa'pchurra Dyus Espiritu tacjni's jyā'jaqui'cue? ⁴ Dyus yuwe's wēse'ljja'ga nacue wala pcyuuni yuui'cue nava Dyus yuwe isa pta'shni's nvijtrra', cyulterrāa pcyuunisa yuune'cue. Tyacue cyulterrāa yu' pcyuuni yuumeevats wejy ewna. ⁵ Dyusa' tyajy Espiritu's ūsrra', quim yujva ājanimeesa's quijquijva caavya'ja'ja'c i'cue'shtyi ew jiyucajn pu'chna sa' ¿ley jycaajni's cytey yuupa'gaga tyā'wē yuuá'? Meerra' ¿cue'sh pta'shni' isasa yujna sūjna jypa'gate vá' tyā'wē yuu?

Abrahan yacj Dyus puuty we'weni

⁶ Abrahana's miijajcywe: Tyā' ūusuj yuurráac Dyusa's jyuca yajcyna nwēese'lj. Atsa' tyā'wē yūuterrāa Dyusa' Abrahana's yuuwemée ewsaac vit. ⁷ Tyāa pa'ga i'cue'sha' mjiiyuwe: Dyusa's ūusuj yuurráa jyuca yajcyna nwēese'ljsa yuurráa Abrahan jil'j yuutyna. ⁸ Tyā'wē judiu jil'mée vite nasava Dyusa's ūusuj jyuca yajcyna nwēese'tjerrāa tyāawe'shtyiva yuuwemée ewsa vitwa'ja's dyiicjēy pta'shnic yuu Abrahana's na'jīna: Maa nasava jyuca ewsa yuutyna iindypa'ga yuurráa jī'c Dyus libroute. ⁹ Tyāa pa'ga maava Dyusa's ūusuj yuurráa yajcyrra nwēese'ljsa' Abrahan na'wēy yuuwemée ewsa'atā' āchwe'shva.

¹⁰ Atsa' Moises ley jycaaja'c tyā'srráana cytey yuusa': Iiméj seena' ewmeesata' jīna Dyus yuu we'werra', iviituwa'tje nviitni ūsta'. Tyajíic Moises ley íiva na'wē we'we': Maava ley jycaajniity jyuca cytey yuusame',

iviituwa'tje nviitni yuutyna jī'c. ¹¹Atsa' tyā'wē leya'srráa nwēese'jsa' quim yujva Dyus dyi'pte yuuwemée ewsa yu' meeta'. Tyājíc āate na'wē pta'shi' Dyus librute': Dyusa's úusuj jyuca yajcyterráa Dyus dyi'pte yuuwemeesa yuuwa'ja's ya'ji'pjuna jī'c. ¹²Atsa' Moises leya' Dyusa's úusuj yaacywa'ja's we'we'tsme!. Tyā'wē úusuj yaacywa'ja's we'wemeerra íc na'wērráa we'we': Maava jycaajna fi'jrra nviitnisarráaty jyuca cytey nwēese'jwa'ja' ĩtyi fi'nzeya' jī'c.

¹³Tyā'wē leya's jyucamée nwēese'pja'ga iiméj seena' yuuwesatja'w yu', tyāa pa'ga Cristoc cue'sh iiméj seena' yuuwesa pa'gate uu, ley castigāyni cue'shtyi nwe'weya'. Tyā'wē iiméj seena' yuuwesa's castigāyni uuwa'ja's na'wēc pta'shi' Dyus librute: Iiméj seena' yuuwesa's maava fytūucjē a'cyrra icjni yuuna jī'c. ¹⁴Tyā'wē Cristo Jesus cue'sh pa'gate uupa'gatja'w judiu ji'jmeerrava Dyusa's úusuj jyuca yajcyna nwēese'pja'ga yuuwemée ewsa yuurra Dyus Espiritu's jypa'gawa'jsa yuu. Tyā'wē yuuwa'ja'scu Dyusa' Abrahan yacj puuty we'we tyā' cytey yuuc.

¹⁵Yacjtjē'jwe'sh, na'wē yūuni's miijajcywe: Cue'sha' quíj yūuya' puuty we'werrava tyā'sa' pechcanamée cytey yuuya' jyuca etste fi'jrra peecy yase's qui'pprac ya'nviitu'. Atsa' tyā'wē yūuni's quim yujva íshiini' jīya' āja'tsmeeta', sa' yu'ptjejya'va āja'tsmeeta'. ¹⁶Tyā'wēy Dyusva Abrahan yacj ew puuty we'werra nviitni's quim yujva yu'ptjejya' ājameetyna vite' Abrahan ji'lj yacj puuty we'weni's. (Dyus we'werra': Indy ji'jwe'sh jī'tsme', naasáa teechráac cysusu': Iindy ji'lj jīnarráa. Tyāa yu' Cristo's we'werrac tyā'jī'.) ¹⁷Na'jī'tj na': Dyusa' úswa'ja's cytey yuuya' Abrahan yacj ewcu puuty we'werra neeyūu, atsa' tyāa puuty we'weni cuatrocientos treinta añu scjēwnijūc Moises leya' casejna úsu!. Naa pa'ga tyāa leya' Dyus ew puuty we'werra nviitni's yu'ptjejya' ājawa'jsame!, e'su casejsa' naa pa'ga. ¹⁸Moises leypa'ga ewte neeyūuwa'ja's jypa'gawa'jsavatsa', dyiicjēy Dyus puuty we'weni' selpiwa'jmée ne' yu!. Nava tyā'wē yūumée, ewte neeyūuwa'ja's Dyusa' Abrahan yacj ew puuty we'werra neeyūuc tyā' Moises leypa'gaméec jypa'gawa'j yu!.

Leya' na'wērráa yuusa'

¹⁹Tyā'wēte!, Moises leya' ¿quíjtega selpi'? Ewmée yūuna fi'nzepa'ga yu'cypejna fi'jrra nviitnisarráac yu!. Sa' Dyus Abrahan yacj puuty we'werra': Indy ji'lj jīc tyāa pa'pjcachrráac tyāa leya' jycaajwa'jsa yu!. Tyāa leya's fi'jrra nviit-sa yu' Dyus angeleswe'shrráaty yu!, atsa' Moisescu jypa'garra jweeju yu' nasaty caapiya'j. ²⁰Nava ewte neeyūuwa'ja's Dyus puuty we'wec tyā'sa' angeleswe'sh jypa'garra peena Abrahana's úsmeeta!. Tyā'wē yūumée, Dyus yuuc tyajy yuweju ewte neeyūuwa'ja's puuty we'we.

²¹Tyā'jīte!, Moises ley yacj Dyus puuty we'wenisa yacja' utyaaya' ājawa'jsamée iipuiisatyna sūjuvá'cue. Tyā'wēsameeta!. Atsa' ley tyā'wē

ewte neeyüuwa'ja's üsya' ãjawa'jsavatsa', leya's nwëese'jsa yu' jyuca ewte yãlj üs yu'nja'w. ²²Nava tyã'wëmeete íc leyíi we'werrava: Jyucaysa pcalte yuurráa üsta' jī'. Tyãa pa'ga Jesucristo's üusuj jyuca yajcyrra yuurráa cue'sh ewte neeyüuwa'ja's Dyus puuty we'wec tyã'sa' jypa'gawa'jsatja'w.

²³Tyãljíte!, Moises leya' Dyus puuty we'weni's atsesana sūjuvácue. Wej yujva atsesame!. Wejy yuuva leya' cue'shtyi jyaawna üssac yu' Jesucristo's üuste jypa'garra ewte neeyüucajn. ²⁴Leya' naasáa Cristo quíjpcach cue'shtyi jype'jsarrác yu', cyaj Cristo quíjte!, tyã'sa' üuste jypa'garra' yuuwemée ewte neeyüuwa'ja's jī'pjucajn. ²⁵Ächja' Cristo's üuste jypa'gawa'j en äjc, atsa' tyãa ley cue'shtyi jype'jsa's peena yu' yaacywa'j jī'pjmeetja'w.

²⁶Tyãa pa'ga i'cue'sha' Cristo's üusuj jyuca yajcyrra nwëese'pja'garráa Dyus luuch yuui'cue. ²⁷I'cue'sh jyucaysa Cristo yacj fi'nzeya' sūjrra yu'te ya'bautisäysa' tyajy cusetete jype'jni üsi'cue. ²⁸Ächja' maa yujva puuty iíwejch yaacywa'jme!. Judiu ma'c yuu meerra' judiumée ma'c yuu, patron jī'pjsa ma'c yuu meerra' patron jī'pjmeesa ma'c yuu, pitstjē'j ma'c yuu meerra' u'y ma'c yuu nava maa yujva puuty iíwejch yaacywa'jme!, tyãa pa'gategy Cristo Jesus yacj fi'nzesa' maa yujva tjaacuemée jyucaysa puuty tyãa na'wërrarráa i'cue. ²⁹I'cue'sha' Cristo's jypa'gasarra', Abrahan jī'jrra tyã'wë yuune'cue, sa' ewte neeyüuwa'ja's puuty we'wec tyã'sa' jypa'gawa'jsai'cue.

4 ¹Ächja' na'sna mjiyuwe: Luucha' ney uute!, le'chcuëy yu' vite tjē'jsa cusetec jype'jni fi'nze' walaarra yu', ney nviitni's jyuca tyãarrarráa jypa'gawa'jsarrava. ²Atsa' le'chcuëy yu' tjē'jsaty tjengna jype'je!, macue tyachpcach ne' neya' neewe'werra tjē'jsa cusetete jype'cjan nvijt tyãa en äjpcach. ³Cue'shva tyã'wëysatja'w yu'. Luuchva ma'wëga le'chcuëy yu' tjē'jsa jype'jni fi'nze!, tyã'wëytja'w nyaffi yu' ley jycaajni tyajy cusetete fi'nzena üsu!. ⁴Nava macue tyachpcach ne'tca'w jype'jni fi'nzewa'jsa yu' tyãa en ptsuute!, Dyusa' tyajy Nchi'ca's caacj, teech u'y cacuete casejrra judiuwe'sh na'wëy leya's nwëese'jwa'jsa. ⁵Atsa' cue'sha' ley jype'jni üsteva, tyã'wë yūurrac tyãajū cutyi'jrra Dyus luuch yuua'ja's üs. ⁶Tyãa pa'ga i'cue Dyus luuch yuuna pa'j, atsa' Dyusa' tyajy Espiritu's i'cue'sh üuste caacj, ächja' Dyus luuchtja'w sūjwa'ja's jī'pjucajn. Tyajc Dyus Espiritu' i'cue'sh üuste caaüusutje'je' Dyusa' cue'sh Tata' sūjwa'ja's. ⁷Tyãa pa'ga ächja' i'cue'sha' ley jype'jnisamée, Dyus luuchi'cue. Atsa' tyajy luuch yuupa'ga Dyusa' tyãa jī's quíjnavá jyuca i'cue'sh jīrrarráa nviituna Cristo nwe'wepa'ga.

Lej jycaajnite qui' shawendsaty yu'cypejni

⁸I'cue'sha' nyaffi yu' Dyusa's jiimeerra!, Dyusmeerráaty i'cue selpiina fi'nzesa yu!. ⁹Nava ächja' Dyusa's jiisa yã'ji'cue meerrava Dyusa' i'cue'shtyi jiia' atsa' ¿quíjya'rráa qui' shawenduqui'cue pitstjē'jwe'sh

caapiya'jni achamée seelpisate fi'nzeya'? 10 Tyā'wē Dyusa's jiiyā'jrra', ley jycaajni entyi qui'sna, a'tetyva qui'sna, añutyva qui'sna nwēese'ljwa'j ji'pjmeei'cue. 11 Tyāa pa'gatj tyā'wē yūutste uyrra wala yaaqui': Cyulrrāa vá'ntca i'cue'shtyi caapiya'j sūjna.

12 Tyāasatj yacjtjē'jwe'shtyi neewe'we', andyva ma'wētca ley caapiya'jni's jyuca nvijtrra i'cue'sh na'wēy ley jycaajnimée fi'nzena ūsu' tyā'wēy yuucajn. 13 Tyā'wē andya' cytee uuya' ūsrra', i'cue'shtyi nyafyrraj Dyus yuwe's pta'shte', 14 ātsa'na ūsteva ajtsemée wejyva Dyus angel meerrava Jesucristo tjasi'cue wechana jypa'ga andya's. 15 Nava tyagachtey wēt wechana yaacynisa' ¿mteega yuu? Na'ji'tj na': Tyagachjii yu' andyna peeygāaweeterrāa i'cue'sh yafytyi cutyi'jrra andyna ūsya' ājavatsa', tyā'wē yūuwa'jne'cue yu'. 16 Nava āchja' isasa's pta'shsa yu's atsesa na'wē yuuna ūsi'cue andya's.

17 Cysū i'cue'shtyi caapiya'jsawe'sha' i'cue'shtyi tyāawe'sh ju'nguty tupji jytjāasu'. Nava ew yajcyrra tyā'wē yu'tsmeeta', naasāa andy caapiya'jniijū tyunde wēerrarrāa tyā'wē yūuna ūsta', i'cue'sha' tyāawe'sh yacj u'cjan. 18 Tyā'wē vitesaty peecy ju'ngu tupjywa'j yuja', nava bagachteva ew yūuwa'jrrā's yajcyrra tyā'wē yūuwa'ja', sa' andy cytee i'cue'sh yacj ij ūsterrāa tyā'wē ew yūusāa na'wē fi'nzewal'jme'. 19 Luuchwe'sh, andya' i'cue'sh tyā'wē yūupa'ga iiméj wala acate űusna ūstju, u'y nasate yaacasāa na'wē. Sa' űusna nes yu'nja i'cue'sha' Cristo na'wēy fi'nzeya' ājapcach. 20 Andya' āchjii'tj cytee i'cue'sh yacj ūs wēje', i'cue'sh jypumbana yaacyni's yu'ptjejya'. Nava jiimeetj i'cue'shtyi ma'wē pu'chwal'ja'sva.

Sara Agar yacj caaja'nda'jni

21 I'cue'sha' ewte neeyūuya' sūjrra' Moises leya's i'cue yaaqui', sa' tyāa leya' na'wēsarrā' tyā'sa' jiyu'tsmeevá'cue. 22 Tyā'sa' jiyucajn na'wē fi'jni ūsa' Dyus librate: Abrahamana' e'nz luuchcu ji'pju ji'c. Teechsa' peecy nyuutewe'shmée, yatte selpisāa u'ytewe'shcu yu', atsa' vite nchi'ca' peecy nyuutewe'shcu yu'. 23 Atsa' yatte selpisaate casejsa' quijva meesa peecy vyaasarrāac yu'. Nava peecy nyuute casejsa' na'wē Dyusa' Abraham yacj puuty we'werra': Luuch ji'pjune'cue jic tyāac yu'. 24 Tyāa e'nz u'ya' na'wēsata': Na'wē Dyus e'nzsa yacj puuty we'wec Abraham vite' Moises yacj tyāata' tyāa e'nz u'ysa'. Dyus puuty we'weni teechsa' Sinaí vits walatec yuu, atsa' cytee puuty we'weni' Agarva ma'wēga vītee jycaajni selpiina fi'nze tyā'wēsa'. Tyāasa íity tyāa puuty we'wenijū upysa' ley jycaajni selpiina fi'nzeya' caseje'. 25 Agara' Arabia quiwesu Sinaí vits wala na'wēsa'; tyā'wēy naa ensu Jerusalen ūsa' tyāava tyāa Sinaí na'wēysa'. Tyajíirráa tyāa chjambte ūssa judiwe'sha' vītee cusete jycaajnisawe'shta'. 26 Naapcachja' cielute Jerusalen chjambtewe'sha' vītee jycaajni fi'nzesameeta'. Cue'sha' cyteewe'shtja'w tjaacuesa. 27 Tyā'sna we'werrac Dyus librate na'ji':

U'y nasa ji'pjuwa'ljmeesarrava, ñusmée wēt miiyajcywe.

Wechana sus mwe'wewe, nasate yaacani's jiimeerrava.

Tyāa pa'gatey luuch ji'pjuwa'ljmeesarrava,

Luuch ji'pjuwa'jsate jy'tjaacue luuch ji'pjuna jī'c.

²⁸Yac'tjē'ljwe'sh, cue'sha' Dyus puuty we'werra': Luuch ji'pjune'cue jīc tyāatewe'shtja'w Isaac na'wēsa. ²⁹Tyāa enteva ma'wēga selpiina fi'nzesa luucha' Dyus puuty we'wenite casejsa luucha's ajtsena quiite, āchjva tyā'wēyrrāa yūuna ūsta'. ³⁰Tyāa ente tyā'wē atsepa'gac na'wē yūuni's Dyus librute pta'shi': Tyāa u'y selpisa's pchi'c íty mcuty'ij. Tyā'wēme' selpisāa nchi'ca' peecy nyuute nchi'c yacj ja'ndarraj jypa'gaya' ājameena ney nviitni's jī'c. ³¹Nava cue'sha' selpisāa nchi'c na'wēsameetja'w, wejyva nyuute nchi'c na'wēsataj'w.

Ley jycaajnimée fi'nzeni

5 ¹Cristo' ley jycaajniū tyujndec, cue'sha' ley jycaajni fi'nzeczajmen. Atsa' i'cue'sha' ewte pa'ljyā'jrra', peena yu' utyaanuwe ley jycaajni's nwēese'ljya'.

²Ew mjiyuwe: Andya' na'jī'tj na', i'cue'sha' circunciona's jypa'gavá'cue atsa' ley jycaajniū Cristo nwe'wec tyā' cyul yuuna. ³Qui' caayaqui'jítstju: Maa pitstjē'ljva ya'circuncidāy yā'jrra', tyā'srrāana jypa'gamée, Moises leya's jyuca nwēese'ljwa'lj jī'p'ta'. ⁴Leya's jyuca cytey nwēese'jrra yuurráa yuuwemée ewte neeyū'nja sūjna yaacysa', Cristo tashu tyutesāa yuune'cue, sa' Dyus peeygāanijūva tyutesāa yuune'cue. ⁵Nava cue'sha' Cristo's ūusuj yuurráa jyuca yaacywa'ja's Dyus Espiritu pu'chte', tyā'wē yūurraráa yuuwemée ewsatja'w yuu. ⁶Tyāa pa'gatey Cristo Jesus yacj fi'nzesa yacja' circuncidāyni ma'c yuu circuncidāynimée ma'c yuu nava tyā'wēsa' peejyme', naasāa Cristo's ūuste jypa'ganirráa tyā'wē', tyāa pa'gatey Cristo's ūuste jypa'ganijū' peeygāawa'ja's ya'lj'pju'c naa pa'ga.

⁷I'cue'sha' ew yā'lj'cue fi'nzena ūs yu', atsa' ¿quimga nwēese'cjamen caypumba'ljna pa'lj? ⁸I'cue'shtyi caypumba'ljna pa'lja' Dyus caajnis a yu'tsmeeta'. ⁹Tyāa pa'ga mpa'yajcywe. Tyā'wēme', levadura' le'chcuēerrava jyucac pēetjeje' scuutyj ū'we macueteva. ¹⁰Tyā'wēteva i'cue'sha' tyacue yu' jypumbacajmen Cristo' pejca pu'chjina sūju'tj. Nava Dyusa' seena' yuj castigaína caypumba'lja's quimteva.

¹¹Yac'tjē'ljwe'sh, miiyajcywe: Andya' tyā'wē circuncidāywa'ja's caapiya'jvatsa', judiuwe'sha' andya's ajtsemeetyna. Tyā'wē yuuvats yu', Cristo' nwe'weya' cluuscjē uuc jīna pta'shnisa' caaūuscha'ljmeena judiuwe'shtyi'. ¹²Nava tyā'wē i'cue'shtyi caacircuncida'lj wēena cuch yuuna fi'nzesa' peecy cacuetewe'sha's tee jwend jyuca ya'spē'tjvatsa', jiyutyna sūju'tj andya'.

¹³I'cue'shtyi' circuncidāycajmení ley jycaajniū nwe'wenisa yā'lj'cue yuu. Nava tyā'ljīte', āchja' leya' we'wewa'lj jī'pjmeena sūjrra peecy

ma'wēva ewmēe yūuna fi'nzewa'ljme', wejyva vitety peeygājna puuty ya'selpiina fi'nzewa'ja'. ¹⁴Tyāa pa'gatey leya' tyā'wē yūuwa'ja'sírráac wejy tjaacue neewe'we' na'ljina: Peequí ma'wēnga ya'peeygāja', tyā'wēy mpeeygāj maatyva jī'c. ¹⁵Nava tyā'wē yūumēe puuty puina yajtsena fi'nzesa' jyuca ja'ndarraaj puuty ptsuune'cue jypa'yacymeerra'.

Cue'sh ūus yaacyni vite' Dyus Espiritu caaūusutje'jni

¹⁶Tyā'wē yūuwe'shte na'wē yūuwa'ja'stju pta'shi': Dyus Espiritu ew caaūusutje'jnirrá's cytey yuuna mfi'nzewe, peecy ūusujrráa yaacyni's cytey yuuya'mée. ¹⁷Tyā'wēme', cue'sh ūusujrráa yaacynisa' pejca yuj ewmeesa'scu yaaqui'. Tyāa pa'ga Dyus Espiritu' cue'sh ūus yaacyni's jypa'ga'tsme', naapcachja' cue'sh ūus yaacyni' Dyus Espiritu's yupu'c. Tyāa pa'ga ne'cue pejca yuj ewmeesarrá's cytey yu'. ¹⁸Nava Dyus Espiritu i'cue'sh ūuste jycaajna ūste', jypumbana ley jycaajnite fi'nzewa'ljsameei'cue.

¹⁹Dyus Espiritu caaūusutje'jnimée peecy ūusujrráa yaacynisa' naata': ptamumée pcal yuuni, ptamsarrava vitesa yacj pcal yuuni, ma'wēva canzh pcal yuuni, ²⁰dyus ityimeesaty neewe'weni, dyijyuuni, ajtsena fi'nzeni, puini, ipyāani, ūuschani, puiiwa'ja's ma'wēva yūuna pacuení, pcjaacjesa yacjtjē'jwe'sh puuty puirra tyutení, ²¹vitesa jipjunity atseni, nasa icjni, tūuna fi'nzeni, tūusáa pwe'sh ma'wēva canzh yuuni, pcal ma'wēsava ūsta' tyāaty cytey yuuni. Tyā'wē yūusatyi' andya' āate pta'shitstju: Tyāawe'sha' Dyus jycaajna ūsnite u'cawa'ljsameeta'. Tyā'sa' nyaffiiva pta'sh yā'tj.

²²Āchja' Dyus Espiritu caaūusutje'jni' naata': peeygāani, wech wecha fi'nzeni, ūuste ewrráa yaacyni, ūuscha yajcymée fi'nzeni, maatyva peeygājna fi'nzeni, vitesaty pu'chna fi'nzeni, wa'lmée nwēese'jna fi'nzeni, ²³iwejch yajcymée fi'nzeni, ūuste ewmēe ūusutjeni's nwēese'jmée fi'nzeni. Tyā'wē ew yā'j fi'nzesa's leya' tjengwa'j jipjme'. ²⁴Cristo nasa yā'ja', peecy ūus yaacyni ewmeesa's cytey yuuna fi'nzewa'j jipjmeeta'.

²⁵Dyus Espiritu tyā'wē ew fi'nzewa'ja's ūste', tyāa yacj yuurráa fi'nzewa'j jiptja'w nwēese'jna. ²⁶Iwejch yajcyna puuty puina ajtsena fi'nzewa'j jipjmeetja'w.

Puuty pu'chna fi'nzeni

6 ¹Yacjtjē'jwe'shtyi neewe'we'tj: Maa yacjtjē'jva ājmée yūuni's jiyurra', tyā'sa' myu'cypejwe, i'cue'sha' Dyus yacj chjāchja yā'j fi'nzesa'icue naa pa'ga. Nava wala jypa'yacy weech we'wemée myu'cypejwe. Tyā'wēme' i'cue'shtyiva wetewa'j en pa'javáana. ²Teechsa na'wērraj puuty ya'mpu'chwe tjēyte fi'nzeni's. Tyā'wē yūurra Cristo jycaajni's cytey yuusáa yuune'cue.

³Quijteva jwee yu' tjaacue ewsameerra tyā'wē iwejch yajcyrra', ĩshiisa yuuna. ⁴Tyāa pa'ga peecy fi'nzeni's cjuē'y yaacywa'j jipja'

¿ma'wësaqui'tj? sūjna. Tyā'wë peecy fi'nzeni ewteva jiyurra, wëtwët yaacywa'ja', nava vitesa fi'nzeni's weechwa'j ji'pjme'. ⁵ Teechsa na'wërraj peecy fi'nzenirrá's wala jypa'yacywa'ja'.

⁶ Cristo jycaajni's cytey yuuna caapiya'jsa's pu'chwa'j ji'pja' peecy ji'pjuni quíj yacjrráava.

⁷ I'cue'sha' ya'jypumbanuwe naa sūjna: Quíjva yūuteva, Dyusa' tyacue yu' jiyumeena sūjna. Dyusa's quim yujva tyā'wë yu' yajcyna weechmeena. I'cue'sh quíj yūurrava tyā'wëysaíirráa jypa'gane'cue. ⁸ Meerrava peecy ūus yaacyni ewmeesarrá's cytey yuusa', uuwa'ja'srráa ji'pjuna tyā'wë yūupa'ga. Nava Dyus Espiritu caaūusutje'jni's cytey yuusa' bagachte yujva ptsumée ityi fi'nzewa'ja's ji'pjuna. ⁹ Tyāa pa'ga ew yūuwa'jrrá's wajtymée cytey yuuna fi'nzewa'j ji'ptja'w. Tyā'wë ew yūuwa'ja's wa'lmée cytey yuuna ūsrra', ewsa's jypa'gawa'j en äjte', jypa'ga'nja'w. ¹⁰ Tyāasa ma'wën enteva vitety ew yūunarráa fi'nzewa'j ji'ptja'w, sa' Dyus yacj fi'nzesa cue'sh yacjtjē'jwe'sh yuutyi' wejy tyā'wë ew yūuwa'j ji'ptja'w.

Peecy cacuetewe'sha's yajcymée Cristorrá's wechani

¹¹ Mtjengwe, andy cuseju yuu ew äate fi'jatstju, i'cue'sh jiyucajn.

¹² Cristo cluuste uuni's pta'shpa'ga yaatseni fi'nze wëemeerrarráa, tyā'wë i'cue'shtyi' caacircuncidaí'j wëena ūsta'. ¹³ Tyāawe'sha' macue ya'circuncidäyrrava, ley jycaajni's jyuca yu' cytey yu'tsmeeta'. Nava i'cue'sh yuutyi' circuncidäycaja'ty, tyā'wë caacircuncidaí'tja'w sūjna weech weech yaacy wëerraty tyā'wë yu'. ¹⁴ Nava andya' quíj yujnava weech weech yaacy wëemeetj, naasáa cue'shtyi jype'jsa Jesucristo cluuste uuni yuurráac andy ūuste wëtwët caaūusutje'je'. Cristo cluuste uupa'ga andy yacja' naa cacuetewe'sha' seelpisame'. Tyāasa andya' naa cacuetewe'sha's nwëese'j wëemeetj, uusáa na'wë. ¹⁵ Tyāa pa'gatey Cristo Jesus yacj fi'nzesa yacja' circuncidäyni ma'c yuu meerra' circuncidäynimée ma'c yuu nava tyā' quíjva meesa', naasáa ewmée ūus yaacyni's yu'ptjerrra fi'nzenisarráa seelpisa'. ¹⁶ Na'wëtj jycaaja' tyā'sa' cytey yuuna fi'nzesa' Dyus peeygāani ew fi'nzewa'ja's jypa'gatyna Dyus luuch jyucaysawe'sh.

¹⁷ Ächja' naajū' peena yu' quimva cuch yuuni peejymetj. Cuch yuucajmení andya' Jesusa's seelpisaatj, tyāa pa'ga pcyuuni cacuete sñal ji'ptju.

¹⁸ Yacjtjē'jwe'sh, cue'shtyi jype'jsa Jesucristo' i'cue'sh jyucaysaty pu'vitumée pu'chjina.